



祖詠集

五言古詩

夕次田居

前程入鄭郊尚經百餘里馬頰時欲歇客歸程未
已落日桑柘陰遙林煙火起西還不遑宿中夜度
涇水

田家即事

舊居東臯上左右俯荒村樵路前傍嶺田家遙對
門權娛始披物愜意在郊原餘霽蕩川霧新秋仍
晝昏攀條憇林麓引水開泉源稼穡豈云倦桑麻

今正煩方求靜者說偶與潛夫言雞黍何必具吾
心之道遵

古意

夫差日淫放舉國求妃嬪自謂得王寵代間無美
人碧羅象天閣坐輦乘芳春宮女數千騎常遊江
水濱年深玉顏老時薄花粧新拭淚下金殿矯多
不顧身生前妬歌舞死後同灰塵塚墓令人哀哀
於銅雀臺楚王意何去獨自留巫山偏使世人見
迢迢江路間駐舟春澤裏誓願拜靈顏夢寐都神
女金沙鳴珮環閑靈絕世姿令人氣力微含笑默

不語化作朝雲飛

答王維留宿

四季不相見相見復何為握手言未畢却令傷別
離升堂還駐馬酌醴便呼兒語嘿自相對安用傍
人知

歸汝墳山莊留別盧象

淹留歲將宴久廢南山期舊業不見棄還山從此
辭漚麻入南澗越楚向東菑對酒鷄黍熟閉門風
雪時非君一延首誰慰遙相思

汝渚秋同仙州王長史翰聞百舌鳥

秋天聞好鳥驚起出簾帷卻念殊方月能鳴已後
時遷喬誠可早出谷此何遲顧影慙無對懷羣空
所思淒涼歲欲晚蕭索路將辭留聽未終曲彌令
心獨悲高飛憑力致巧轉任天姿返覆知而靜間
關斷若遺花繁上林路霜落汝川湄且長凌風翮
乘春自有期

五言律詩

江南旅情

楚山不可極歸路但蕭條海色晴看雨江聲夜聽
潮劍留南斗近書寄北風遙爲報空潭橘無媒寄

洛橋

泊楊子岸

纔入維揚郡鄉關此路遙林藏初過雨風退欲歸
潮江火明沙岸雲帆礙浦橋客衣今日薄寒氣近
來饒

泗上馮使君南樓作

井邑連淮泗南樓向晚過望灘沙鷺起尋岸俗僮
歌近海雲偏出兼秋雨更多明晨擬回棹歸思恨
風波

留別盧象

朝來已握手宿別更傷心
灞水行人渡商山驛路
深故情君且足謫宦我難任
直道皆如此誰能淚
滿襟

題韓少府水亭

梅福幽棲處佳期不忘還
鳥啼當戶竹花繞傍池
山水氣侵堦冷松陰覆
座閒寧知武陵趣宛在市
朝間

蘇氏別業

別業居幽處到來生隱心
南山當戶牖澧水映園
林竹覆經冬雪庭昏未夕
陰寥寥人境外閒坐聽

春禽

宿陳留李少府

相如有叔卿訟簡夜彌清
旅宿倦愁卧空堂聞曙
更風簾搖竹影秋雨帶蟲
聲歸思那堪說悠悠恨
洛城

扈從御宿池

君王既出狩輦路入秦京
遠樹低槍壘孤山入幔
城寒疎清禁漏夜警羽林
兵誰念迷方客長懷魏
闕情

過鄭曲

路向滎川谷晴來望盡通細烟生水上圓月在舟
中岸勢迷行客秋聲亂草蟲旅懷勞自慰淅淅有
涼風

汝墳別業

失路農爲業移家到汝墳獨愁常廢卷多病有離
群鳥雀垂牕柳虹霓出澗雲山中無外事樵唱有
時聞

題遠公經臺

蘭若無人到真僧出復稀苔侵行道席雲濕坐禪
衣澗鼠緣香案山蟬噪竹扉世間長不見寧止暫

忘歸

七夕

閨女求天女更闌意未闌玉庭開粉席羅袖捧金
盤向月穿鍼易臨風整線難不知誰得巧明旦試
相看

觀華岳

西入秦關口南瞻驛路連彩雲生闕下松樹到祠
邊作鎮當官道雄都俯大川危峯徑上處彷彿有
神仙

宴吳王宅

吳王承國寵列第禁城東連夜徵詞客當春試舞
童砌分池水岸窓度竹林風更待西園月金樽樂
未終

贈苗發員外

宿雨朝來歇空山天氣清盤雲雙鶴下隔水一蟬
鳴古道黃花落平蕪赤燒生茂陵雖有病猶得伴
君行

中峯居喜見苗發

自得中峰住深林亦閉關經秋無客到入夜有僧
還暗澗泉聲小荒園樹影閒高窓不可望星月滿

空山

送劉高郵枕使入都

常聞積歸思昨夜又兼秋鄉路京華遠王程江水
流吳歌喧兩岸楚客醉孤舟漸覺潮初上悽然多
暮愁

陸渾水亭

晝眺伊川曲巖開霽色明殘沙明有路流水漫無
聲谷鳥沿波聚潛魚觸釣驚更憐春岸綠幽意滿
前楹

五言排律

清明宴司勳劉郎中別業

田家復近臣行樂不違親
霽日園林好清明煙火
新以文長有會唯德自成鄰
池照窓陰晚杯觴樂
味春簷前花覆地竹外鳥窺人
何必桃源裏深居
作隱淪

家園夜坐寄郭微

前堦微雨歇開戶散窺林
月出夜方淺水涼池更
深餘風生竹樹清露薄衣襟
遇物遂遙嘆懷人滋
遠心依稀成夢想影響絕
微音誰念窮居者明時
嗟陸沉

酬汴州李別駕贈

秋風多客思行旅厭艱辛
自洛非才子遊梁得主
人文章參末議榮賤豈同倫
歎逝逢三演懷賢憶
四真情因思舊好契託死生
親所愧能投贈清言
益潤身

七言律詩

望薊門

燕臺一去客心驚
笙鼓喧喧漢將營
萬里寒光生
積雪三邊曙色動
行旌沙場烽火侵
胡月海畔雲
山擁薊城小
雖非投筆吏
論功還欲請長纓

五言絕句

終南望餘雪

終南陰嶺秀積雪浮雲端林表明霽色城中增暮寒

歸汝墳莊

漚麻入南澗刈麥向東菑對酒雞黍熟閉門風雪時

寄王長史

汝穎俱宿好往來託層巒終日何寂寞繞籬生蕙蘭

宿李明府客堂

旅宿倦愁卧空堂聞曉更風簾搖燭影秋雨帶蟲聲

唐祖詠洛陽人開元十二年進士張說引為

駕部員外郎集一卷殷蟠云詠詩剪刻省靜

用思尤苦氣雖不高調頗凌俗至如霽日園

林好清明煙火新亦可稱為才子也詠有歸

汝墳莊別盧象云漚麻入南澗別楚向東菑

對酒雞黍熟閉門風雪時又度淮河寄武平

一云天色混波濤岸陰匝林墅等句見僧皎

然詩式

祖詠集

祖詠集卷終

常建集卷上

五言古詩

送陸擢

聖代多才俊陸生何考槃南山高松樹不合空摧
殘九月湖上別北風秋雨寒殷勤歎孤鳳早食金
琅玕

送李十一尉臨溪

泠泠花下琴君唱渡江吟天際一帆影預懸離別
心以言神仙尉因致瑤華音回軫撫商調越溪澄
碧林

江上琴興

江上調玉琴一絃清一心泠泠七絃遍萬木澄幽
陰能使江月白又令江水深始知梧桐枝可以微
黃金

湖中晚霽

湖廣舟自輕江天欲澄霽是時清楚望氣色猶霾
暄踟躕金霞白波上日初麗煙虹落鏡中樹木生
天際杳杳涯欲辨蒙蒙雲復閉言乘星漢明又覩
寰瀛勢微興從此愜悠然不知歲試歌滄浪清遂
覺乾坤細豈念客衣薄將期永投袂遲回漁父間

一鴈聲嘹唳

宿王昌齡隱居

清溪深不測隱處唯孤雲松際露微月清光猶爲
君茅亭宿花影藥院滋苔紋余亦謝時去西山鸞
鶴羣

送楚十少府

微風吹霜氣寒影明前除落日未能別蕭蕭林木
虛愁煙閉千里僊尉其何如因送別鶴操贈之雙
鯉魚鯉魚在金盤別鶴哀有餘心事則如此請君
開素書

張山人彈琴

君去芳草綠西峰彈玉琴豈惟丘中賞兼得清煩
襟朝從山口還出嶺聞清音了然雲霞氣照見天地
心玄鶴下澄空翩翩舞松林改絃扣商聲又聽飛
龍吟稍覺此身妄漸知仙事深其將鍊金鼎永矣
投吾簪

白湖寺後溪宿雲門

落日山水清亂流鳴淙淙舊浦雨抽節新花水對
窓溪中日已沒歸鳥多爲雙杉松引直路出谷臨
前湖洲渚晚色靜又觀花與蒲入溪復登嶺草淺

寒流速圓月明高峯春山因獨宿松陰澄初夜曙
色分遠日日出城南隅青青媚川陸亂花覆東郭
碧氣銷長林四郊一清影千里歸寸心前瞻王程
促却戀雲門深畢景有餘興到家彈玉琴

閒齋卧病行藥至山館稍次湖亭二首

旬時結陰霖簾外初白日齋沐清病容心魂畏虛
室閑梅照前戶明鏡悲舊質同袍四五人何不來
問疾

行藥至石壁東風變萌芽主人山門綠小隱湖中
花時物堪獨往春帆宜別家辭君嚮滄海爛熳從

天涯

塞上曲

翩翩雲中使來問太原
卒百戰苦不歸刀頭怨明
月塞雲隨陣落寒日旁
城沒城下有寡妻哀哀
哭枯骨

仙谷遇毛女意知是秦宮人

溪口水石淺泠泠明藥叢
入溪雙峰峻松栝踈幽
風垂嶺枝嫋嫋翳泉花濛濛
賞綠霽人目路盡心
彌通盤石橫陽崖前流殊
未窮回潭清雲影瀾漫
長天空水邊一神女千歲
為玉童羽毛經漢代珠

翠逃秦宮目覲神已寓鶴
飛言未終祈君青雲祕
願謁黃仙翁嘗以耕玉田
龍鳴西頂中金梯與天
接幾日來相逢

夢太白西峰

夢寐昇九崖杳靄逢元君
遺我太白峰寥寥辭垢
氛結宇在星漢宴林閉氤
氲簷楹覆餘翠巾寫生
片雲時往溪水間孤亭晝
仍曛松峰引天影石瀨
清霞文恬目緩舟趣霽心
投鳥群春風又搖擢潭
島花紛紛

鄂渚招王昌齡張儉

川蘆曠野中沙上飛黃雲天晦無精光茫茫悲遠
君楚山隔湘水湖畔落日曛春鴈又北飛音書固
難聞謫居未爲歎讒枉何由分午日逐蛟龍宜爲
弔冤文翻覆古共然名宦安足云貧士任枯槁捕
魚清江瀆有時荷鋤犁曠野自耕耘不然春山隱
溪澗花氤氳山鹿自有場賢達亦顧群二賢歸去
來世上徒紛紛

春詞二首

蕤蕤黃柳絲濛濛雜花垂日高紅粧卧倚對春光
遲寧知傍淇水驪褭黃金羈

翳翳陌上桑南枝交北堂美人金梯出素手自提
筐非但爲蠶饑盈盈嬌路傍

晦日馬鐙曲稍次中流作

夜寒宿蘆葦曉色明西林初日在川上便澄遊子
心秦天無纖翳郊野浮春陰波靜隨釣魚舟小綠
水深出浦見千里曠然諧遠尋扣船應漁父因唱
滄浪吟

古意

牧馬古道傍道傍多古墓蕭條愁殺人蟬鳴白楊
樹迴頭望京邑合沓生塵霧富貴安可常歸來保

貞素

宿五度谿仙人得道處

五度谿上花生根依兩崖二月尋片雲願宿秦人
家上見懸崖崩下見白水湍仙人彈碁處石上青
蘿盤無處求玉童翳翳唯林巒前溪遇新月聊取
玉琴彈

西山

一身爲輕舟落日西山際常隨去帆影遠接長天
勢物象歸餘清林巒分夕麗亭亭碧流暗日入孤
霞繼日渚遠陰映湖雲尚明霽林昏楚色來岸遠

飛門閉至夜轉清迥蕭蕭北風厲沙邊鴈鷺泊宿
處蒹葭蔽圓月逗前浦孤琴又搖曳冷然夜遂深
白露霑人衣

春詞

階下草猶短墻頭梨花白織女高樓上停梭顧行
客問君在何所青鳥舒錦翮

贈三侍郎

高山臨大澤正月蘆花乾陽色薰兩崖不改青松
寒士賢守孤貞古來皆共難明君錯認才臺上飛
三鸞操與霜雪明量與江海寬束身視天涯安能

窮波瀾孤鶴在枳棘一枝非所安逸翮望絕霄見
欲凌雲端層臺何其高山石流洪湍固知非天池
鳴躍同所歡誰念獨枯槁四十長江干責躬貴知
已効拙從一官折翮悲高風苦饑候朝飡湖月映
大海天空何漫漫托身未知所謀道庶不刊吟彼
喬木詩一夕常三歎

第三峰

西山第三頂茅宇依雙松杳杳欲至天雲梯昇幾
重瑩魄澄玉虛以求鸞鶴蹤逶迤非天人執節乘
赤龍旁映白日光縹緲輕霞容孤輝上煙霧餘影

明心胸願與黃麒麟欲飛而莫從因窅清萬像輕
雲自中峰山暝學棲鳥月來隨暗蒼尋空靜餘響
嫋嫋雲溪鐘

古興

漢上逢老翁江口爲僵屍白髮沾黃泥遺骸集烏
鴟機巧自此忘精魄今何之風吹釣竿折魚躍安
能施白水明汀洲菰蒲冒深陂唯留扁舟影繫在
長江湄突兀枯松枝悠揚女蘿絲託身難憑依生
死焉相知偏觀今時人舉世皆爾爲將軍死重圍
漢卒猶爭馳百馬同一街萬輪同一規名與身孰

親君子宜固思

高樓夜彈箏

高樓百餘尺直上江水平
明月照人苦開簾彈玉
箏山高猿狖急天靜鴻
鴈鳴曲度由未終東峯
霞半生

客有自燕而歸哀其老而贈之

羸馬朝自燕一身爲二連
憶親拜孤塚移葬雙陵
前幽願從此畢劍心因
獲全孟冬寒氣盛撫轡
告言旋碣石海北門餘
寇惟朝鮮離離一寒騎
孑孑馳白天生別皆自
取况爲士卒先寸心漁
陽興落

日旌竿懸

白龍窟汎舟寄天台學道者

夕映翠山深餘暉在龍窟
扁舟滄浪意澹澹花影
沒西浮入天色南望對
雲闕因憶莓苔峯初陽
濯玄髮泉蘿兩幽映松
鶴間清越碧海瑩子神
玉膏澤人骨忽然爲枯
木微興遂如兀應寂中
有天明心外無物環迴
從所汎夜靜猶不歇淡
然意無限身與波上月

張天師草堂

靈溪宴清宇傍倚枯松
根花藥繞方丈瀑泉飛
至

門四氣閉炎熱兩崖改明昏夜深月整皎亭午朝
始暎信是天人居幽幽寂無喧萬壑應鳴磬諸峯
接一魂遂登子因田生樽時節開玉書宵
映飛天言心化便無影目精焉累煩忽而與霄漢
寥落空南軒

古意三首

二妃方訪舜萬里南方懸遠道隔江漢孤舟無歲
年不知蒼梧處氣盡呼清天愁淚變楚竹蛾眉喪
湘川後人立爲廟累世稱其賢過客設祠祭狐狸
來坐邊懷古未忍還猿吟徹空山

明月照高閣綵女褰羅幕歌舞臨碧雲簫聲沸珠
箔青鸞臨南海天上雙白鶴萬里齊翼飛意求君
門樂玉霄九重閉金鎖夜不開兩翅自無力愁鳴
雲外來態深入空貴世屈無良媒俛仰顧中禁東
飛白玉臺

楚王竟何去獨自留巫山偏使世人見迢迢江漢
間駐舟春溪裏皆願拜靈顏寤寐見神女金紗鳴
珮環閑艷絕世姿令人氣力微含笑竟不語化作
朝雲飛

漁浦

春至百草綠陂澤聞鶻鷓別家投釣翁今世滄浪
情漚紵爲緼袍折麻爲長纓榮譽失本真恠人浮
此生碧水月自闊安流淨而平扁舟與天際獨往
誰能名

空靈山應田叟

湖南無村落山舍多黃茆淳朴如太古其人歸鳥
巢牧童唱巴歌野老亦獻嘲泊舟問溪口言語皆
啞咬土俗不尚農豈暇論肥瘠莫佻射禽獸浮客
烹魚鮫余亦朶且人獲麋今尚苞敬君中國來願
以充其庖日入聞虎鬪空山滿咆哮懷人雖共安

異域終難交白水可洗心采薇可爲穀拽策皆落
日江風鳴梢梢

太公哀晚遇

日出渭流白文王畋獵時釣翁在蘆葦川澤無熊
羆詔書起遺賢匹馬令致辭因稱江海人臣老筋
力衰遲遲詣天車怏怏悟靈龜兵馬更不獵君臣
皆共怡同車至咸陽心影無磷緇四牡玉墀下一
言爲帝師王侯擁朱門軒蓋曜長逵古來榮華人
遭遇誰知之落日懸桑榆光景有頓虧倏悲天地
人雖貴將何爲

昭君墓

漢宮豈不死異域傷獨沒
萬里駝黃金蛾眉爲枯
骨迴軍夜出塞立馬皆不發
共恨丹青人墳上哭
明月

弔王將軍墓

嫖姚北伐時深入疆千里
戰餘落日黃軍敗鼓聲
死嘗聞漢飛將可奪單于壘
今與山鬼隣殘兵哭
遼水

常建集卷上

常建集卷下

七言古詩

古意

井底玉冰洞地明琥珀轆轤青
絲索仙人騎鳳披
彩霞挽上銀瓶照天閣黃金作身
雙飛龍口銜明
月噴芙蓉一時渡海望不見曉上
青樓十二重

古興

轆轤井上雙梧桐飛鳥銜花日將沒
深閨女兒莫
愁年玉指泠泠怨金碧石榴裙裾蛺蝶飛
見人不
語顰蛾眉青絲素絲紅綠絲織女錦衾當爲誰

張公子行

日出乘釣舟孑孑持釣竿涉淇傍荷花驄馬閑金
鞍俠客白雲中腰間懸轆轤出門事驃姚爲君西
擊胡胡兵漢騎相馳逐轉戰孤軍西海北百尺旌
竿沉黑雲邊笳落日不堪聞

五言律詩

題破山寺後禪院

清晨入古寺初日照高林竹徑通幽處禪房花木
深山光悅鳥性潭影空人心萬籟此都寂但餘鐘
磬音

送李大都護

單于雖不戰都護事邊深君執幕下秘能爲高士
心海頭近初月磧裏多愁陰西望郭猶子將分淚
滿襟

潭州留別

賢達不相識偶然交已深宿帆謁郡佐悵別依禪
林湘水流入海楚雲千里心望君杉松夜山月清
猿吟

聽琴秋夜贈寇尊師

琴當秋夜聽况是洞中人一指指應法一聲聲爽

神寒蟲臨砌急清吹裊燈頻何必鍾期耳高閒自
可親

泊舟盱眙

泊舟淮水次霜降夕流清夜久潮侵岸天寒月近
城平沙依鴈宿候館聽鷄鳴鄉國雲霄外誰堪羈
旅情

江行

平湖四無際此夜泛孤舟明月異方意吳歌令客
愁鄉園碧雲外兄弟淶江頭萬里無歸信傷心看
斗牛

讌居

青苔常滿路流水復入林遠與市朝隔日聞鷄犬
深寥寥丘中想渺渺湖上心嘯傲轉無欲不知成
陸沉

七言絕句

送宇文六

花映垂楊漢水清微風林裏一枝輕即今江北還
如此愁殺江南離別情

落第長安

家園好在尚留秦耻作明時失路人恐逢故里鶯

花笑且向長安度一春

塞下

鐵馬胡裘出漢營分麾百道救龍城左賢未遁旌
竿折過在將軍不在兵

題法院

勝景門間對遠山竹深松老半含煙皎月殿中三
度磬水晶宮裏一僧禪

嶺猿

杳杳裊裊清且切鷓鴣飛處又斜陽相思嶺上相
思淚不到三聲合斷腸

三日尋李九莊

雨歇楊林東渡頭永和三日盪輕舟故人家在桃
花岸直到門前溪水流

塞下曲四首

玉帛朝回望帝鄉烏孫歸去不稱王天涯靜處無
征戰兵氣銷為日月光

北海陰風動地來明君祠上望龍堆髑髏皆是長
城卒日暮沙場飛作灰

龍鬪雌雄勢已分山崩鬼哭恨將軍黃河直北千
餘里冤氣蒼茫成黑雲

因嫁單于怨在邊蛾眉萬古葬胡天漢家此去三
千里青塚常無草木烟

戲題湖上

湖上老人坐磯頭湖裏桃花却水流竹竿嫋嫋波
無際不知何者吞吾鉤

常建集卷下終

嚴武集

班蓮婕

賤妾如桃李君王若歲時秋風一已勁搖落不勝
悲寂寂蒼苔滿沉沉綠草滋繁花非此日指輦競
何辭

酬別杜二

獨逢堯典日再覩漢官時未效風霜勁空慙雨露
私夜鐘清萬戶曙漏拂千旗並向殊庭謁俱承別
館追斗城憐舊路鍋水惜歸期峰樹還相伴江雲
更對垂試回滄海棹莫拓敬亭詩祇是書應寄無

忘酒共持但令心事在未肯髮毛衰最悵巴山裏
清猿醒夢思

寄題杜拾遺錦江野亭

漫向江頭把釣竿懶眠沙草愛風湍莫倚善題鸚
鵡賦何須不着鴛鴦冠腹中書籍幽時曬肘後醫
方靜處看興發會能馳駿馬應須直到使君灘

題玄武禪師屋壁

卧向巴山月落時兩鄉千里夢相思可但步兵偏
愛酒也知光祿最能詩江頭赤葉楓愁客籬外黃
花菊對誰歧馬望君非一度冷猿秋鴈不勝悲

杜負外兄垂示詩因作此寄上

新詩海內流傳久舊德朝中屬望勞郡邑地卑饒
霧雨江湖天闊足風濤松花酒熟傍看醉蓮葉舟
輕自學操春興不知凡幾首衡陽紙價頓能高

軍城早秋

昨夜秋風入漢關朔雲邊月滿西山更催飛將追
驕虜莫遣沙場匹馬還

